

每週經課朗誦經文(巴克禮台語漢字)2014/01/01

共同經課 - 1

民數記六章二十二節~二十七節

22 耶和華吩咐摩西講：23 「你著吩咐亞倫及伊的子講：恁著按呢給以色列人祝福，對in講：24 『願耶和華賜福你，保護你。25 願耶和華互伊的面的光照你，施恩互你。26 願耶和華歡喜的面看你，賞賜你平安。』27 按呢in欲用我的名下佇以色列人的頂面；我也欲賜福in。」

共同經課 - 2

詩篇八篇

1 〔大衛的詩，交互樂官。用迦特的樂器。〕耶和華——阮的主啊，你的名佇全地到即高大！你將你的榮光排設佇天裡。2 你因為你的對敵的緣故，對嬰仔及食奶者的嘴，建立能力，欲互對敵及報冤者靜靜。3 我看你的天你的手所造的，及你所排列的月及星，4 世間人是甚麼，你數念伊？人的子是甚麼，你眷顧伊？5 你互伊比天使厘仔卡輪，閣賞賜伊榮光尊貴做冕旒。6 你設立伊管理你的手所造的，下萬物佇伊的腳下，7 就是一切的羊及牛，山野的走獸，8 天中的鳥、海內的魚，及見若經過海裡的路的，攏佇伊的腳下。9 耶和華——阮的主啊，你的名佇全地到許高大！

共同經課 - 3

加拉太書四章四節~七節、腓立比書二章五節~十一節

4 若是到彼個時已經滿，上帝差伊的子，對婦仁人來出世，出世佇律法下，5 來贖回律法下的人，互咱受設立做子。6 為著恁是做子，上帝差伊的子的神入咱的心，喉叫講：「阿爸！父啊！」7 親像按呢，你毋是猶原做奴僕，就是做子；既然做子，就對上帝來做後嗣。

5 恁著有基督耶穌的心做心：6 伊本有上帝的形狀，無掠及上帝平等做所著執守的；7 反轉傾空家己，取奴僕的形狀，成做人的樣相；8 已經有親像人的款式，就屈家己，順服到佇死，甚至死佇十字架。9 所以，上帝高升伊極高，賞賜伊彼個名搬(pôaⁿ)過佇萬名的頂面的，10 互見若佇天、佇地，及佇地下的，佇耶穌的名無一個腳頭窩毋跪拜，11 無一個嘴毋稱呼「耶穌基督做主」，來歸榮光父上帝。

共同經課 - 4

路加福音二章十五節~二十一節

15 諸個天使離開in，上天的時，顧羊的相及講：「今咱來去伯利恆，看所成的事，就是主所報咱知的。」16 就緊緊去，尋著馬利亞及約瑟，閣看見嬰仔暍佇槽裡；17 看了，就將天使所對in講此個嬰仔的事報人知。18 聽見的人攏奇怪顧羊的所對in講的事。19 獨獨馬利亞將諸個話記住住，心內常常啲想。20 顧羊的倒去，為著所聽見的所看見的，就是天使所對in講的，來歸榮光謳啫上帝。21 到第八日，給嬰仔行割禮的期，就號伊的名叫耶穌；就是伊未投胎的時，天使所號的。